

आकाशवाणी

खास-खास खबरां:-

1. भारत ते इंडोनेशिया नै हर चाली दे आतंकवाद दी सख्त निंदेया करदे होई अंतर्राष्ट्री कनून मूजब, आतंकवाद कन्नै निब्बड़ने लेई नतीजाकुन ते आपसी तालमेल आले जतनें दा आहवान कीता ऐ।
2. प्रधानमंत्री नरेन्द्र मोदी इंडोनेशिया दी संसद गी सम्बोधित करने आहले पैहले भारती प्रधानमंत्री बनी गे न।
3. प्रधानमंत्री हुंदे दफ्तरै अल नीनो दे बक्ख बक्ख-क्षेत्रे पर पेई सकने आहले असर ते उन्दे शा बचाऽ बारे तयारिये दी समीक्षा गितै इक उच्ची सतह दी समीक्षा बैठक लोआई।
4. प्रवर्तन निदेशालय -ED ने तृणमूल कांग्रेस दे किश बैंक खातें थमां कथित माली लैन-देन, गैर-कनूनी तरीके कन्नै रपे-पैसे दे संग्रह ते संदिग्ध तौर पर पैसा मुंतकिल कीते जाने दे सरबंध्य च कोलकाता ते ओदे आले-दोआले दे 5 परिसरें दी तलाशी लैती ऐ।
5. अमरीका नै ईरान पर ताजा हमले कीते न। एह हमले होर्मुज जल डमरु मध्य च कारोबारी जहाजें पर होई 3दी कार्रवाई दे बाद कीते गे न।
6. फुटबाल च स्विटज़रलैंड नै कोलंबिया गी हराइयै 1954 दे बाद पैहली बारी फीफा विश्व कप दे क्वार्टर फाईनल च अपनी थाहर पक्की करी लैती ऐ।

Ind. Indon. Terrorism

भारत ते इंडोनेशिया नै हर चाल्ली दे आतंकवाद दी सख्त निंदेया करदे होई अंतर्राष्ट्री कनून मूजब, आतंकवाद कन्नै निब्बड़ने लेई नतीजाकुन ते आपसी तालमेल आले जतनें दा आहवान कीता ऐ। जर्काता च प्रधानमंत्री नरेन्द्र मोदी ते इंडोनेशिया दे राष्ट्रपति प्रबावो सुबियांतो हुंदे बशकार दपक्खी वार्ता दे बाद जारी सांझे ब्यान च दौनें नेताएं संयुक्त राष्ट्र सुरक्षा काउंसल दी 1267 प्रतिबंध समीति दे तैहत नामित आतंकवादियें ते आतंकी गुटें कन्नै आलमी सतह पर बंदश आले आतंकवादियें ते आतंकी गुटें खलाफ कार्रवाई करने दा आग्रैह कीता। दौनें नेताएं आतंकवाद ते हिंसक उग्रवाद दी रोकथाम ते इंदा मुकाबला करने च सहयोग गी होर मजबूत करने पर सैहमति जताई।



India –Indonesia

प्रधानमंत्री नरेन्द्र मोदी इंडोनेशिया दी संसद गी सम्बोधित करने आहले पैहले प्रधानमंत्री बनी गे न। जकार्ता च इंडोनेशिया दे सांसदे गी सम्बोधित करदे होई मोदी होरें सांझा सभ्यतागत विरासत, लोकतांत्रिक मुल्लें ते भविक्ख आस्तै सांझा नजरिए पर अधारित दपक्खी सरबंधें दे इक नमें युग दा आहवान कीता। एदे थमां पैहले प्रधानमंत्री होरें इंडोनेशिया दे राष्ट्रपति प्राबावो सुवियंतो हुंदे कन्नै दपक्खी सरबंधें दे बक्ख-बक्ख आयामें पर गल्ल कीती। उ'नें दौनें मुख्खें बशकार भ्याली गी होर व्यापक बनाने गी बल दिता। दवै नेता आपसी हित आहले केई सारे क्षेत्रें च समझौता ज्ञापनें पर दस्तखत होने आहले पल दे गवाह बने।



PM- Prambanan Temple

प्रधानमंत्री नरेन्द्र मोदी होर अज्ज इंडोनेशिया दे राष्ट्रपति हुंदे कन्नै योग्याकार्ता च प्रंबानन मंदर दा दौरा करडन। एदे कन्नै भारत ते इंडोनेशिया बश्कार इक जहार बरे थमां चले आवा'रदे गैहरे सांस्कृतिक ते सभ्यतागत सरबंध प्रदर्शित हुंदे न। 9मीं शताब्दी च निर्मित प्रंबानन मंदर इंडोनेशिया दा सब्भनें थमां बड्डा हिंदू मंदर परिसर ऐ। मूल रूप च इस परिसर च भगवान ब्रह्मा, विष्णु ते शिव होरेंगी समर्पित 240 लौहके बड्डे मंदर न। भारत ते इंडोनेशिया नै प्रंबानन मंदर परिसर दे संरक्षण ते उसी परतिए नमें सिरेआ सोआरने आस्तै महत्वपूर्ण पैहल दी घोषणा कीती। एदे तैहत भारतीय पुरातत्व सर्वेक्षण राएं यूनेस्को विश्व धरोहर थाहर, एदी चुनिंदा संरचनाएं दे संरक्षण आस्तै सहायता प्रदान करोग।



PM -Australia Visit

प्रधानमंत्री नरेन्द्र मोदी होर अपने त्रै मुख्ये दे दौरै दे अपने गेड़ च अज्ज मेलबर्न पुजडन। प्रधान मंत्री मोदी अपने त्रै दिन दे दौरै दौरान आस्ट्रेलिया दे प्रधानमंत्री एंथनी अल्वानीज़ हुंदे कन्नै त्रिए भारत-आस्ट्रेलिया सालाना शिवर सम्मेलन च हिस्सा लैडन। मोदी होर भारत- आस्ट्रेलिया CEO फोरम च दौने मुख्यें दे आला दर्जे दे कारोबारी

नेताएं दी सभा गी बी सम्बोधित करडन। मोदी होर प्रवासी भारतीयें दी इक बड्डी सभा अगगे बी भाषण देडन।

<><><><><><>

PMO –EL –Nino

प्रधानमंत्री हुंदे दफ्तरै कल अल नीनो दे बक्ख-बक्ख क्षेत्रें पर पेई सकने आहले असरें ते उन्दे शा बचाऽ बारे तयारियें दी समीक्षा गितै इक उच्ची सतह दी समीक्षा बैठक लोआई। बैठक प्रधानमंत्री हुंदे प्रधान सचिव डाक्टर पी.के. मिश्रा हुंदी अध्यक्षता च “सेवा तीर्थ” च लोआई गई, जेहदे च 15 कोला मते मंत्रालयें दे सचिवें ते होरनें सीनियर अफसरें हिस्सा लैता। इस मौके मिश्रा होरें आखेआ कि अल-नीनो दे खतरे गी लेइयें निगरानी उपरोतली जारी राहनी लोइचदी ते संवेदनशील जिलें पर मानसून दे असर दा आंकलन, राज्यें कन्नै तालमेल बनाइयें कीता जाना लोइचदा, जेहदे नै लोइ पौने पर कारवाई कीती जाई सकै। उ’नें आखेआ कि पशु चारे दी सुद्दी मात्रा च दस्तयाबी जकीनी बनाने लेई बी लोइचदियां गेंई पुट्टियां जान ते कन्नै गै चारा विकास योजनां तयार कीतियां जान। उ’नें राज्यें दे तालमेल कन्नै इस सब पर उपरोतली निगरानी रखने पर चेचे तौरा पर जोर दिता उनें संवेदनशील जिले च पीने आहले पानी दी दस्तयाबी पर जोर दिंदे होई आखेआ कि इनें जिलें च पानी दे स्रोतें जियां खूह, बालियां, तलाह दे जल स्तर पर निगरानी दी मती लोइ ऐ। प्रधानमंत्री हुंदे प्रधान सचिव होरें सम्भनें मंत्रालयें गी राज्यें कन्नै मिलियें कम्म करने ते मुद्दे दा असरदार ढंगै सिर नबेड़ा जकीनी बनाने दे बी निर्देश दिते।

<><><><><><>

ED-TMC

प्रवर्तन निदेशालय -ED ने तृणमूल कांग्रेस दे किश बैंक खातें थमां कथित माली लैन-देन/ गैर-कनूनी तरीके कन्नै रपे-पैसे दे संग्रह ते संदिग्ध तौर पर पैसा मुंतकिल कीते जाने दे सरबंध्य च कोलकाता ते ओदे आले-दोआले दे 5 परिसरें दी तलाशी लैती ऐ। एह तलाशी हवाबाजी खेतर दी इक निजी कम्पनी Carewell समूह दिएं कम्पनिएं ओदे डरैक्टरें ते इक कथित चुनावी ट्रस्ट कन्नै जुड़े दे परिसरें पर कीती गई। शुरुआती जांच मूजब संदिग्ध गतिविधियें लेई हवाबाजी ते जातरा कम्पनियें दे राहें डेढ़ सौ करोड़ रुपें शा मते मुंतकिल कीते गे। ED नै दस्सेआ जे अप्रैल 2023 थमां जून 2026 बशकार तृणमूल कांग्रेस दे खातें थमां निजी हवाबाजी कम्पनी ते ओदे'नै जूड़ी दी इकाई गी तकरीबन 160 करोड़ रपे मुंतकिल कीते गे।

<><><><><><>

EAM-Ind. Bahrain

बदेश मंत्री डाक्टर एस. जयशंकर होरें आखेआ ऐ जे भारत बहरीन दा सैहयोग लगातार मज़बूत होआ करदा ऐ। जयशंकर हुंदी दंऊ दिनें दी बहरीन जातरा कल सम्पन्न होई। जातरा दे दरान डाक्टर जयशंकर होरें बहरीन दे राजा हमद-बिन-ईसा-अल-खलीफा ते काऊन प्रिंस ते प्रधानमंत्री सलमान-बिन-हमद-अल-खलीफा हुंदे'नै मलाटी कीती। इ'नें मलाटिएं दरान बदेश मंत्री होरें राष्ट्रपति द्रौपदी मुर्मू ते प्रधानमंत्री नरेन्द्र मोदी हुंदा अभिवादन व्यक्त कीता ते बहरीन दे कन्नै लम्मी अवधि आली ते दोस्ताना दपक्खी सांझ-भ्याली गी होर गैहरा करने लेई भारत दी वचनबद्धता गी फही पक्का कीता। उ'नें बहरीन च भारती समुदाय दी सुरक्षा ते कल्याण जकीनी बनाने लेई बहरीन दे नेतृत्व गी धन्नवाद दिता। उ'नें बहरीन दे उप-प्रधानमंत्री ते बदेश मंत्री हुंदे'नै बी

मलाटी कीती। जयशंकर कतर/बहरीन/कुबैत/ओमान/न्यूयार्क ते ब्रुसेल्स दी 11एं दिनें दी जातरा पर न।

<><><><><><>

US-Iran Attack

अमरीका नै ईरान पर ताजा हमले कीते न। एह हमले होर्मुज जल डमरु मध्य च 3 कारोबारी जहाजें पर होई दी कारवाई दे बाद कीते गे न। अमरीका दी सेंट्रल कमान नै सोशल मीडिया पर आखेआ ऐ जे होर्मुज च ईरान आसेआ बेदोसे नागिरकें दे कारोबारी जहाजें गी निशाना बनाने दे बाद एह हमले कीते गे। अमरीका दी सेना ईरान दी वायु रक्षा प्रणालियें- समुन्द्री कंडे दी निगरानी आली प्रणालियें- मिसाइलें ते ड्रोन दे प्रक्षेपण आली थाहरें गी निशाना बना करदी ऐ। ईरान दे उप-बदेश मंत्री काज़ेम गरीबाबादी होरें आखेआ ऐ जे एह ताज़ा हमले समझौते दी उल्लंखना न। अमरीका नै दुश्मनी खत्म करने लेई होए दे अंतरिम समझौते तैहत ईरानी तेल दी बिक्री गी अधिकृत करने आला लसेंस बी रद्द करी दिता ऐ।

<><><><><><>

FIFA

फुटबाल च स्विटज़रलैंड नै कोलंबिया गी हराइयै 1954 दे बाद पैहली बारी फीफा विश्व कप दे क्वार्टर फाइनल च अपनी थाहर पक्की करी लैती ऐ। वैंकूवर च खेड्डे गेदे मुकाबले च दौनें टीमां बादू समें दे खत्न होने तगर कोई गोल नैई करी सकियां। एदे परैन्त पनैल्टी शूटआउट च स्विटज़रलैंड नै 4-3 कन्ने जित दर्ज कीती।

तोंआई राउंड ऑफ 16 दे इक होर मुकाबले च अर्जेन्टीना नै मिस्र गी 3-2 कन्नै हराया। अटलांटा च खेड़े गेदे मुकाबले च अर्जेन्टीना 78में मिन्ट तगर 2 गोल थमां पिच्छे हा पर उन्नै जबरदस्त वापसी कीती। क्वार्टर फाईनल च अर्जेन्टीना दा मुकाबला स्विटज़रलैंड दे कन्नै होग।

<><><><><><>

Men's Cricket

मर्दे दे टी-20 क्रिकेट च कल रातीं इंग्लैंड नै भारत गी 125 रन्जें कन्नै हराई दिता ऐ। 5 मैचें दी श्रृंखला दे त्रीये मैच च पैहले बल्लेबाजी करदे होई कल रातीं नाटिंघम च इंग्लैंड नै भारत गी 202 रन्जें दा लक्ष्य दिता। एहदे परते च पूरी भारती टीम 11 ओवरें ते 4 गेंदे च छड़े 75 रन्ज बनाइयै गै आऊट होई गेई। इंग्लैंड दी तरफा जोश Tongve नै 4 विकेटां जिसलै के जोफ्रा Archer नै 3 विकेटां लैतियां। जोफ्रा Archer गी Player of the Match चुनेआ गेआ। इस जित दे कन्नै इंग्लैंड नै श्रृंखला च 2-0 दी बढ़त बनाई लैती ऐ। इस श्रृंखला दे आखरी दंऊ मैच ब्रिस्टल ते साउथैम्पटन च खेड़े जाडन। एहदे परैन्त भारत/ इंग्लैंड दे खलाफ इक ध्याड़े आले 3 मैचें दी श्रृंखला बी खेड़ग।

<><><><><><>

Weather

मौसम विभाग नै अगले 2-3 दिनें च दक्खन-पच्छिम मानसून दे उत्तरी अरब सागर/राजस्थान/हरियाणा ते पंजाब दे बाकी हिस्सें च अगगे बधने दी मेद जताई ऐ। उप-हिमालयायी पच्छिम बंगाल दे तराई आले इलाकें/ सिक्किम/महाराष्ट्र/कर्नाटक/पूर्वी

राजस्थान/गुजरात/कोंकण ते गोवा च अज्ज मौलेधार बरखा दा अंदाजा ऐ। दिल्ली/
हरियाणा/चंडीगढ़/हिमाचल-प्रदेश/जम्मू-कश्मीर/लद्दाख ते पूर्वोत्तर दे किश हिस्सें च बी
तेज बरखा बरी सकदी ऐ।

<><><><><><>